



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

US-i Ukraine nem security guarantees magütsütsü: Trump

Delhi Capitals nung Kevin Pietersen mentor kümogo



VOL. XXII ISSUE NO. 135 (ADOK 135)

DIMAPUR

ROGONÜ (FRIDAY)

TSÜKLAI (FEBRUARY) 28, 2025

₹ 5.00

Ration Card aser mobile number sendakteptsü metetdaksür

Dimapur, Tsüklai/February 27 (TYO): Directorate of Food & Civil Supplies ajanga sangdong ka nung, Ministry of Consumer Affairs, Food & Public Distribution, Department of Food & Public Distribution, Government of India ajanga tetuyuba ama National Food Security Act, 2013 kübok jang o tzü agizükba AAY & PHH beneficiaries ajungai Ration Card Management System (RCMS) Portal update asütsü atema pei teti agizükba Fair Price Shops/ District Offices nung mobile number agütsütsüla, ta metetdaksü.

Ano beneficiaries shirnoksa tang tashi Aadhaar aser ration card mesendaktepi ali mesüra e-KYC status merenemi lir, parnoka tekeratiba nung iba maparen

inyaktsüla, ta metetdaksü. Mobile number mesendaktep, eKYC meinyak mesüra Aadhaar number aser ration card mesendaktepi alirtem indang ration card(s) delete sütsütsü aser iba sülen Ration Cards nungi jang o tzü magizüktettsü, ta sangdong ajanga ashi.

Item maparen ya March 31, 2025 tashinung tembangtsüla. Iba atema District Food & Civil Supplies Offices aser Fair Price Shops ajunga nem beneficiaries den yaritepa mapang shidak nung iba maparen tembangtsü asoshi totuyuba agütsüogo.

Iba dak sendakba nung beneficiaries temi Fair Price Shops mesüra District Food & Civil Supplies Offices den tongteprateptsü akok, ta sangdong ajangasa ashi.

Nagayimten ken o bentettsü tejangraba nung Nagaland yanglu: Chingwang Konyak

Kohima, Tsüklai/February 27 (TYO): Tanü Nationalist Democratic Progressive Party (NDPP) tir Chingwang Konyak-i, December 1, 1963 nung Nagaland state yangluba ya Government of India-i Naga nung yimten tebilemtsü benteta Nagaland-i tesunep aser yimchiyimjung bener arutsü tejangraba nung inyakba lir, ta ashi.

"Iba yongji Naga nung nem pei sasa ketdang asütsü tashi, teinyaktsü aser maongka agütsü," ta pai Capital Cultural Hall, Kohima nung NDPP pur 5th General Convention nung tir o jembidang ashi.

Naga nung puti otsü nung mezüngbuba süa khuret abenba aser nüburtemi kanga junga metetba sorkar ka Nagaland Nationalist Organization (NNO) ajanga January 1964 nung kumtet.

Iba sülen Government of Nagaland yagi Naga nung yimtenren tebilemtsü benteta Nagaland-i yimjung aser terenlok bener arutsü temulungtetba nung maparen balala inyaka aru, ta pai ashi.

NNO party aser par sorkar mapang nungi tenzüka Nagaland nung aliba political party ajunga aser sorkar melentepa arudang Naga nung aliba tesem ajunga lungjemdaksütsü asoshi inyaka aru ta ashi.

Naga nung aliba tesemtem Nagaland state nung lungjemdaksütsü asoshi Nagaland Legislative Assembly nung pangzüng ponguben renema agizükogo, ta Konyak-i metetdaksü.

"Ajisüaka tatalokba balala ajanga asangsang nung mapa kuma inyaka aotsü tasak akum," ta pai ashi.

India den yimten ken o angatetteptsü asoshi linük tenzüker telok balala lenir temi

joko mapang tali meindoktsü Nagaland nung aliba nüburtemi aginer, ta ashi.

"Yimtenren tsütsü tangatettep kati marutet tashi Nagaland nung tesunep malitsü. Anungi Nagaland nung aliba nüburtem asoshi tongtipangtiba teinyaktsüji iba tebilemtsü teti asoshi bentettsü lenmang bushitsüba ya lir," ta NDPP tiri ashi aser National works lenirtem dang ka kuma lungjemer Gol den memonui Naga political issue bentettsü ayongzüker.

"Asenoki telemsa adokdaksüba politics masayar, asenok telungtem, terenlok aser asen nübur nem tashi agütsütsü asoshi nokdaka lir," ta NDPP tir Chingwang Konyak-i ashi.

Paisa tang tashinung NDPP nung Primary Members 1,68,401 aser Active Members 83,592 lir ta ashi aser yamaji inyakettsüsa yariba asoshi Chief Minister, Dr. Neiphiu Rio dang pelaba lemsatop.

"Pai mangdang tajung yur len aniba ajanga NDPP ya Nagaland nung political force tajungtiba ka ama lir," ta Chingwang-i ashi.

"Asenok asoshi yimtenren tsütsü alizüng tongtetba tongtipang kaji küm 20 sülen Municipal aser Urban Local Body elections takok ngua agitetba ya lir, aser iba yagi democratic government nung chapter tasen ka tenzüker. Asen state puti otsü nung tang mezüngbuba tetsür nem menden shilem 33 agüja yimsüsüba nung tongtipang shilem agitsü parnok nem tashi agütsü. Iba ama terenlok akaba mera yagi policy balala yangluba aser local administration nung tetsür ola tali tuluba kumdaksür," ta pai ashi.

Nüburtem takum tajungba kuma melenshidaksütsü aser lenla ajunga nung terenlok alitsü nükjidong nung state sorkari flagship programmes aika tenzüker, ta paisa ashi.

NDPP-i Naga nung ajungtsü asoshi inyaktsü pangjemshi

Kohima, Tsüklai/February 27 (TYO): Nationalist Democratic Progressive Party (NDPP) pur 5 buba General Convention tanü Kohima nung amungdang Nagaland aser nüburtemajangzüksü asoshi inyaktsü pangjemshia liasü.

Iba mungdang nung Chief Minister Neiphiu Rio aser party tir Chingwang Konyak densema tongtipang party lenirtem aden, kong Indo-Naga political issue bentettsü, rongsenketzüng terenlok, lanur nem tashi agütsütsü, junga yimsü asütsü aser Naga nung sobaliba wazüka ayutsü asoshi lungjemtsü nüngdakba indang jembia liasü.

Indo-Naga political issue mebenteti aliba ya teti dang aser tarutsü nunga Party indang agenda tematiba alitsü ta pangjem aser Naga Political Issue ya tongtipang lemjem ka nung lir asünung, Naga political groups ajunga dang nüburtem ola aser tejangraba angashia lungjemer arok nükjidong atongtsü asoshi jembishinütsü ayongzüka liasü.

Teti asoshi yimjung alitsü aser Nagaland aser Naga nung terenlok atema terenlok alitsü asoshi tangatettep kati arutsü tongtipang lir ta jembia.

Naga political groups aser yangji tesüiba aser tang lenir temi

bendanga agütsür Naga nung puti otsü aser sobaliba alimai meteta aser wazüka ayutsü asoshi inyakba atema pelar. Aser ibaji taoba ato kilonser asür Atal Behari Vajpayee-i October 2003 nung Nagaland semdangba mapang sangdongba ajanga jangjatsür, ta ashi.

NDPP-i Centre dang tang aliba Free Movement Regime (FMR) agientsü telemtetba agia aliba lepa reprangshitsü aser Indo-Myanmar arütsü nung atsü atsüba tekeraba nung anentsü ayongzüka liasü.

Item tesem nung Naga nungertem tenokdangba makai lia aser senzusemponga arur. FMR agiena atsü atsüba ajanga State tensa nung kanga mejungi kongshitsü aser tang tejembidak Indo-Naga political ken o nunga tetsükdaksü ajurutsü aser tensa mejungi akumtsü akok, ta NDPP tetsübo lemsatopa liasü.

NDPP-i Eastern Nagaland nüburtemi Frontier Nagaland Territory amenoktsü akhangba bhukumer ta jembia.

NDPP-i Centre dang state nung Protected Area Regime tanaben benokba agientsü ayongzüker, kechiaser iba ozüng yagi tourism aser industrial sectors ainba nung tetsükdaksü kanga mejungi agütsür.

Rongsenketzüng tsütsü linük

Mkg Dist GBs Association Lokti Senden kaogo

Mokokchung, 27th Feb (TYO): Indigenous, PRC, ST amala certificate atema arudang GB-temi "No Objection Certificate" ya mashimashi magütsütsüi timi meita reprinter ang agütsütsüla. Iba o ya EAC Vitolu-i Mokokchung District GBs Association pur lokti senden sentong Feb 27, 2025 nü MDGBA hall nung akadang metetdaksü.

Iba sentong nung tetushi tejaoker Mokokchung DC, Thsuvisei Phoiji meyonga arusang EAC, Vitolu-i jembidang, taoba mapang Naga hills nung kodang British-India yimsüsüba aru, idangji tanga telen (institution) metenzükdang

mezüngbuba GB telen tenzüker aser ibaji mezüngbuba aser tejentiba telen ka ta züngshir, kechiyong iba telen ya administration aser police dang nungi tamaba lir, ta ashi. Ibaji kechiba ta süra nenok dak tenendak, tashi angaba, bendanga agütsüba aser tamang katetba ajanga liasü, ta ashi.

Paisa GB-tem nem tashi agütsüba kar lemsatopedang, British-India yimsüsüba mapang nenok nem tashi aser khuret aika nungloksü, item rongnung talisa nenok nem revenue sarutsü tashi agütsüba ajanga tanüa kümshi kilen saru sarua arur, tanabuba nung, nenok nem obendangtsü (judiciary) tashi

agüja nisung tepsepba dak alaka tanga keno ajak GB telen ajanga sobaliba yimya nung bendanga liasü, ta pai metetdaksü.

Tasembuba nung, executive tashi agütsü aser ibaji yimtsüng nung kechi maparensa inyakdir, terenlok mapa süshia mesüra mapa ajak nung yimtsüng ajungtsü asoshi GB-tem dak pei bilemba ashitsü tashi lir. Government-i nenok ya ex-officio ka ama shimtetba lir, nenok ya pei yimtsüng nung sarkar meyongertem lir, "Deputy Commissioner & EAC meyonger ka masü nenok ya state sarkar meyonger kaka lir", ta EAC Vitolu-i ashi.

(Maneni tapak 2 nung...)

WSSU-i nüburtem dang tekumandangtsü metetdaksür

Dimapur, Tsüklai/February 27 (TYO): Western Sumi Students' Union (WSSU) ajanga state alema oa azünger aser mapa inyakker tenüng bendenba maparen tenzüker koga ta metetdaksü.

Dimapur nung Brehostibarnü osangbener senden ka nung jembidang, osangtsüsang tajungba nung agitepa aser koda masü timtem ajurudang mapang shidak nung teyari agütsütsü asoshi iba inyakyim ya tenzüker, ta WSSU ketdangtsür temi ashi.

Iba registration maparen tang teinyakdak aser pei sasep unit office ajanga inyaktsü, ta ashi.

Maneni dokan kibur aikati Cigarettes and Other Tobacco Products Act (COTPA) 2003 sülen manidaki moko agi yangluba oset ayoker, anungji onoki ozü jurisdiction nung tim department den lungjemer kakat reju aser medical institutions telungzüker nung moko agi yangluba oset ayokba meita aotsü, ta parnok ashi.

WSSU-isa business establishments dang Sumi kin nungi kija mesüra lokti tentet balalai senotsü teyari meshiba magizüktsü ayongzüker aser yamaji senzüba metetra Union

nem osang agüjang ta ashi.

State nung aser talisa Dimapur nung yi ayokba aser ozüng agi memelai bars aser lounges tem lapokba indang tebilemtsü parnok lemsatopa liasü aser sorkar aser danga civil society organisation temi tang ama ola madoki lira parnok ajem-ajema melie mera agitsü ta metetdaksü.

Ano western Sumi region nung aliba immigrant farmers atema apex tribal bodies den lungjemer census agiba mapa inyaktsü, ta WSSU-isa metetdaksü.

Residential Technology Clinic ayongzüka agi



NBRC, Sovima, Chumoukedima nung Raising and Accelerating MSME Performances (RAMP) scheme kübok Bamboo Sector atema Residential Technology Clinic agiba mapang ketdangsürtem aser clinic nung shilem agirtem tangokba noksa nung angur.

Dimapur, tsüklai/February 27 (TYO): Department of Industries and Commerce and Nagaland Industrial Development Corporation Ltd. (NIDC)-i ayongzüka Raising and Accelerating MSME Performances (RAMP) Scheme kübok Bamboo Sector atema Residential Technology Clinic takok ngua agiogo.

Iba sentong ya Nagaland Bamboo Resource Centre, Sovima, Chumoukedima nung agi aser Nagaland Bamboo Development Agency (NBDA)-i technical teyari agüja liasü.

Technology Clinic ya February 24 nungi 27 tashi agia liasü, kong state kübok tesem balala nungi nüburtemi shilem agiogo. Nagaland State Rural Livelihoods Mission (NSRLM) den peta Self-Help Group (SHG) züngsemtem shirnok bamboo sector nung sendaka lir parnokia iba sentong nung shilem agiogo. Anogo pezü Technology Clinics agiba mapang session ajak nung nisung 40-i shilem agia liasü.

"Innovating with Advanced Bamboo Technology", onük nung ajemdaker agiba mapang clinic ya onük asem; Clinic 1: Bamboo Basic Course; Clinic 2: Bamboo Handicraft & Utility Items Training; Clinic 3:

Bamboo Furniture Training dak ajemdaker agia liasü.

NBDA team züngsem aser shisalen sayur Dr. Tolto Metha-i Clinic 1 agi, kong pai au tamshiyim aika aliba aser rongsen lenmang sadema lapoka aliba indang lemsatep. Paisa, India nung au tapu 144 aliba nungi Nagaland nung 45 bo lir ta ashi, koba state ajak dang nungi timba lir.

Paisa, ki asüba, furniture, bioethanol, ornaments amala densema au tamshidak aika aliba lemsatep.

Iba course ajangsa au ya plastic melena amshitsü atema lenmangtem bushitsü aser au agi khen dang amshir intokba osettem yanglutsü koda tongtumbang iba indang asadanga liasü.

Session tembangba sülen sentong nung shilem agirtem Nagaland Bamboo Resource Centre-i anir ao, kong parnok dang bamboo process asüba technology aser machinery tem sayua liasü.

Clinic 2 aser Clinic 3 ya Master Trainers, Khrolo Naro aasernd Rouvi Chuzho nati agia liasü. Iba session nung hands-on training densema liasü, kong centre nung aliba machine balala amshia sentong nung shilem agirtemi au tapu balala

amshia liasü.

Kasa mapang nung NIDC General Manager Temjenyanger Jamir-i sentong nung shilem agirtem dang RAMP scheme ajanga maongka agütsübatem takok tashi agitsü ajungshia liasü. RAMP team-isa lokti pela agizükba o jembia aser scheme indang tangazükba agüja liasü.

RAMP ya World Bank-i teyari agütsüba India sorkar indang scheme ka lir, koba shishilembatsü atema lenmang lapoktsütsü, sen aputsü maongka agütsütsü aser MSME tem capacity building atema lir.

Nagaland nung MSME tem atsülanga aoba den modernize asüba mapang tangar den toktepa aintsü atema advanced machinery aser technology nüngdaker. RAMP kübok Technology Clinics ajanga entrepreneur tem nem parnok shishilembatsü atema shisatsü aser technical skill agütsütsü asoshi mongintem aser technocrat tem longjemdaksür.

COVID-19 sülen iba sentong yagi tongtumbang shilem agidar aser Nagaland nung entrepreneur aser MSME tem nem hadir, resources aser tenüngdakba teyari agüja arudar.

Mkg Dist GBs Association Lokti...

(TAPAK 1 NUNGI...)

Pezübuba nung, Rules for Administration of Justice and Police in Nagaland, 1937 ta sür ta ozüing ka lir, ibaji kodang reprangdir, tensa tia majungba mapang aser police malidang, nenoki rural police mapa inyaktetsü GB-tem nem tashi agüja lir. Nenok karibo meteta alitsü saka ano khen lepa or nenok nem agütsüba tashi aser khuret (responsibilities)-temji angazükshi nungbo kanga ajungtsü, ta paisa ashi.

Aji dang masü GB-temi inyaksü khuret aika lir. Tatishitsü agi, Covid-19 mapanga nenoki sarkar den yaritepa yakbang süa mapa tulu inyakogo, election mapang, census aoba mapang nenok teyari nüngdaker, sarkari shimba rongnung itasen malibaji GB-tem dang lir, nenok itasenbo mali saka khuretbo aika. Tarutsü nunga khuret aika arutsübasa, anungji, tanü nenoki district administration aser sarkar den koma teka amtepa arur yamaji tarutsü nunga kasa amalitepji lidaktsünür, ta paisa mepishia ashi.

Reprangdanga ora Nagaland

nung yimtsüing aika nung kin tila pur aiben maongka junga mangur, kin tulutemi dang teimba amokseper yimsü asür, yimtsüing kar nung yamalaji atalokba lira, sarkar meyonger ka ama GB-temi itemji reprangshim nungbo kanga ajungtsü ta paisa mepishia metetdaksü.

Tanabuba nung, land, indigenous, PRC, ST certificate amala nung Head GB/Senior GB nungi kuli tejangja medeni administration-i itemji magütsür, anungji, itemji junga mereprangi kuli sütsüra liso nisungtem nem agütsüba maongkaji tangari rakzüka oatoktsü. Anungji, item kulikaket atema arudang kanga junga reprangshimer dang "No Objection Certificate" ji agütsütsüla, ta paisa tawa atalokba tatishitsü ka bener arua lemsatep.

British nung mapang nungi tanü tashi GB-temi sarkar maparen balala den yimden yimsüsür den yaritepa mapa tulu inyakba asoshi pelaba den samanir kin ka ama Aor sobliba puti otsü wazüka ayuba den ochi aser tazüokba nung timi yimsü asütsü aser nüburtem asoshi

tsüingnep tajung yutsütsü merangang, ta Ao Senden tir, Marsanen-i tayongzüka o jembidang metetdaksü.

Naga nung asoshi political solution ya kanga tongtumbang ka lir, saka tanü tia maka telok onsara kümer mangmangteper, iba ama tensa ka nung GB-temi anir "Framework Agreement" aser "Agreed Position" dak ajemdaker Naga nung solution atema ola adoktsü asoshi paisa ayongzüka jembia.

MDGBA pur 2025-2030 kümsük anitsü asoshi item ketdangpurtem shimtetogo:

1. Tir (shimshir): Along Jamir (Tongdentsuyong ward, Mokokchung)
2. Tatong Tir: Imtisanen (Chuchuyimpang)
3. Tongti Zülur (shimshir): Imlitemsu (Penli ward, Mokokchung)
4. Repsem Zülur (shimshir): Temsutoshi (Changtongya Town)
5. Senotsü Zülur (shimshir): Temjennungba (Yimyu Ward)
6. Kimen (shimshir): Tsüktimongba (Tongdentsuyong ward Mkg)

Dimapur Ao Lanur Telongjemi aitsür

Dimapur, Tsüklai/February 27 (TYO): February 24 nü Dimapur District Hospital nung mozüki staff kati külem Naga tsür nursing trainee ka dak teka sangshiba atema Dimapur Ao Lanur telongjemi aitsüogo.

Iba amala inyakyim aser talisa tetsür anema jenjang agiba ya minprongtsüka aser Naga nung sobaliba anema lir, kong tetsürtem meraket ya temaba jenjang nung ajungketa amshir.

DALT-isa, police-i kanga kara jenjang agia aibelenalir apuba atema kanga pelaba lemsatepa liasü. DALT-isa administration aser law enforcement ketdangsürtem dang takaratiba nung ochi obendang agütsütsü aser temzüing ozüing dak ajemdaker aibelenalirtem nem tapet

temerenshi agütsütsü mepeshia metetdaksüogo.

Maneni parnok, ken o dak sendaka aliba ketdangsürtem dang tarutsü nung iba amala lendong mataloktsü atema hospital telongtet nung security akangshitsü ayongzüko. Mozüki ya tetsübu agi sünga aliba masü saka kanga dang kümzüka aliba aser nüburtem anepaluba tesem ka asütsüla. Shiranger, kaketshir aser staff tem ajak kümzüka toktsütsü atema takokba tashi jenjang tapet agitsü nüngdaker, ta DALT-isa ashi.

Maneni ken o nung akoksar aser lar kinungertem den Dimapur Ao Lanur Telongjem nokdaka aliba DALT Media Cell sangdong ka ajanga metetdaksü.

Dimapur nung mejangjaba tasü mang kanguteta lir

Dimapur, Tsüklai/February 27 (TYO): February 27 nü Station Manager, NF Railway Dimapur nungi, Khatkhathi len km 261/1-2 nung train agi nisung ka menüngseter aliba indang osang agüja liasü.

Osang angazükba sülen duty Officer den duty party iba tesem yagi ao aser arishi küm 40 nungi 45 tsüingda asütsü ta bilemba non-local tebur ka tasü mang nguteta liasü. Pa ya train agi menüngset asütsü ta temulung melema bilemer.

Temzüing ozüing dak ajemdaker tinyaktsü maparen

ajak tembang inyakba sülen tasü mang ya PM examination aser identification atema District Hospital Morgue-i benerogo.

Asüsang yagi light green long pant, jacket tanak, anüngsentsü tula aser aut sentsü vest semer liasü. Pa sentsü tanak liasü.

Asüsanger kinunger aser medemerem dang Officer-in-Charge, Govt. Railway Police Station, Dimapur (Mobile No. 7085055021) den

tongteprateptsü mepeshia metetdaksüogo.

NCSU jongdak senden ka ayongzüka menogo

Dimapur, Tsüklai/February 27 (TYO): February 26 nü Nagaland Contractors & Suppliers Union (NCSU) jongdak senden ka Head office conference Hall, Kohima nung menogo.

Iba senden nung NCSU Head office ketdangpurtem, district ketdangpurtem aser lokti balala nungi züngsemtemi shilem agia liasü.

Senden nung teküboklen agüja aliba bangzüing yanglua liasü:

- 1) Senden nung "sorkar ka, saru ka" atema ajang ajanga nokdaksü aser telok balala saru mesüra takhangba dak sendakba NCSU züngsem kar danga tetsükdaksü ajangshira ken o ya NCSU Head office nem metetdaksütsü lemtet.

- 2) Sorkar ketdangsürtem mesüra Engineer kari danga Class-I contractor registration bena lira tangsa tang memonoi agintsütsü, kechiyong iba ya ozüing alema aser merenshitsü langa lir.

- 3) NCSU-isa senden ajanga Nagaland sorkar dang financial year 2025-2026 atema state sorkar department ajak indang mapatem metetdaksütsü m e p e s h i a metetdaksüogo.
- 4) PMGSY-III (three) dak sendakba nung NCSU District unit ajaki tsüngtong oa asadangsüla aser 2025 küm March ita 13 nü tashi nungbo NCSU Head office nem osang tejangja agütsütsü telemtetba agiogo.

METONGSHITSÜR

Tir Yimyim Adok 134, February 27 Tapak 2 nung "Kohima nung state level workshop ka ayongzuk" osang Photo caption "Chief Minister's Mobile Operation Theatre (CM-MOT) surgical" ta alibaji "Water Resources Department, Kohima nung February 25, 2025 nü 7th Minor Irrigation Statistics (MIC), 2nd Census of Water Bodies and 1st Spring Census with reference Year 2022-2023 indang anogo ka state level training agidang tangokba noksa ka nung Commissioner & Secretary, Gregory Thejawelie, IAS den ketdangsür aser shilem agirtem angur." ta tazüngertemi metongshia züingdaksüner. Aibelenba atema sasar.

Hindi-Sanskrit ajanga north Indian oshi 25 raksatsüogo: MK Stalin

New Delhi, Tsüklai/February 27 (Agencies): Brihostibarnü Tamil Nadu Chief Minister, MK Stalin-i, Hindi oshi ajanga north India nung regional oshi aika jenjang raksatsüogo, ta ashi.

North India nunger regional oshitemji akhidang nungi aliba nüngshi oshitem lir, ajisüaka Hindi maitüsü ajanga akhidang nungi aliba tetsü oshitem tepseter, ta pai ashi.

"Hindi-Sanskrit oshi ajanga north India nung aliba oshi 25 shi raksatsüogo. Küm 100 dak tali Dravidian movement ajanga Tamil oshi aser sobaliba kümzüka ayu," ta DMK lenirisa ashi.

New Education Policy (NEP) kübok oshi asem policy aija Tamil Nadu CM-i, "State aika nung oshi asem policy lir aser state aika nung India nunger tanga oshitem dang nungibo Hindi mesüra Sanskrit

tongti kümdaktsür," ta ashi.

"Hindi oshi kangshia benokbaji onoki anemer. Hindi ya 'mask' lir aser Sanskrit ya nembanga aliba tejak lir," ta pai ashi.

"Tanga state tem nung aliba kü adianutem. Hindi oshi ajanga India nunger oshi kwi raksatsürar meteter lir ma? Bhojpuri, Maithili, Awadhi, Braj, Bundeli, Garhwali, Kumaoni, Magahi, Marwari, Malvi, Chhattisgarhi, Santhali, Angika, Ho, Kharia, Khortha, Kurmali, Kurukh aser Mundari densema oshi aika taküm alitsü timtemer. Hindi maitüsü ajungkettsüba ajanga akhidang nungi aliba tetsü oshitem tepseter. Uttar Pradesh aser Bihar na ya Hindi oshi tiyongsü tesemtem masü liasü, parnok indang chichiba oshitembo joko tesüiba mapang aliba oshi kümogo," ta Stalin-i X ajanga metetdaktsü.

Stalin-isa, "Hindi oshi mejembiba state tem nung Hindi oshi kangshia benokba ajanga lendong balala ajangshiba atema o lemtepdar. Ajisüaka ketdangsertem indang iba project ajanga Hindi jembiba tesemtem nung Magadhi aser Bhojpuri ama oshitem-a jenjang raksatsür," ta metetdaktsü.

"Hindi oshi ajanga tanga oshi aika samatsüogo saka Tamil oshi aser sobaliba tang tashi taküm lir," ta pai metetdaktsü.

Mongolbarnüa Stalin-i, "Oshi dak sendakba tongbang ka atema Tamil Nadu renema dang lir," ta metetdakja liasü.

"National Education Policy (NEP) ya asen chirnurtem tarutsü atema amokmeren ka lir. Onoki oshi kecha anema menokdaker. Ajisüaka onok matsüngdang kangshia oshi ka benoktsü merangba anema onoki nokdaktsü," ta pai metetdaktsü.

Chhattisgarh kübok Sukma district nung Maoists telungpur 4 apu

Raipur/New Delhi, February 27 (Agencies): Brihostibarnü Chhattisgarh state kübok Sukma district nung Maoists telungpur pezü apu aser parnok ket nungi tapoktsü oset aika puogo, ta police-i metetdaktsü.

Maoist telungpurtemi Chintalnar area nung security sepaitem amaktsü asoshi tapoktsü ali telung nung rema

yutsütsü tebilemba liasü, ta police-i metetdaktsü.

Maoists telungpurtemji arrshi küm 28 Rava Hadma, Vetti Aayta (30), Barse Bheema (25) aser Madkam Kosa (42) nunger liasü. Par pezüpronglaji Ravguda yim anasa arem nung lia apu.

Central Reserve Police Force (CRPF) aser district

police senteper telungpurtem mita aoba mapang nung par pezü apu. Par pezüpronglaji Morpalli yim nungi lir.

Sepaitemi parnok ket nungi gelatin rod 15, electronic detonators ana, non-electronic detonator 8, cortex wire metre 12, Maoist pamphlets aser command switch ka apu.

Tim masüba nung RTI amshir nem temerenshi agütsütsüla: Tushar Mehta

New Delhi, February 27 (Agencies): Brihostibarnü Delhi high court nung ken o ka angadangba mapang nung Solicitor General, Tushar Mehta-i, tim masüba nung Right to Information (RTI) Act, 2005 amshirtem nem temerenshi agütsütsüla, ta ashi.

Delhi University (DU)-i Ato kilonser Narendra Modi indang Bachelor of Arts degree metetdaktsütsü memelungba pusema Mehta-i iba o ya jemb.

"RTI Act ya amshitsü atema lir. Ajisüaka iba ya tim masüba nung amshira temerenshi agütsütsüla," ta Mehta-i ashi.

Mehta-i, tim masüba nung RTI Act amshirtem ya tiyongsü nung amoshia inyaktertem lir, anungji parnok nem temerenshi agütsüba ajanga tangar-a tansütsü, ta pai ashi.

Delhi University tenüng nung jembidang Mehta-i, iba Act amshia iba


ama osang metetpelabaji nüburtem ajungtsü nükjidong nung inyakba masü saka yimtenren tsütsü nungi inyakba lir, ta ashi.

Justice Sachin Datta matsüngdang jembidang Mehta-i, "Kaketshir ka indang degree asüngdang, linük nung Ato kilonserji shiba. Onoki mimshitsüsa kecha mali. Küm sasep nung register lir, aser yangji ajak shia lir. 1978 küm BA original degree ji court dang sayutsü DU-i memelungi mali," ta ashi.

Mehta-isa, "Kar 1978 küm 'pass' asü aser nenoki ibaji yimtenren nükjidong kar atema amshiner. Onok ket nung lir saka onoki melemsateptsü. Ibaji lemsatepra asenok dang osang lakh aika asüngdangtsü," ta ashi.

Ato kilonser Modi-i election affidavit nung pa DU nung 1978 küm BA Political Science course renem ta shia lir.

Kerala nung CPI lenir, P Raju süogo



New Delhi, February 27 (Agencies): Kerala nung CPI lenir aser taoba mapang MLA, P Raju Brihostibarnü alima nungi

pilaogo; pa arrshi küm 73 liasü.

Raju ya CPI state council nung züngsem ka liasü aser Ernakulam district nung küm aika CPI secretary inyaka liasü.

Pa 1951 küm July 18 nü aso. Pa CPI nung menden balala nung küm aika tenzüka liasü.

1991 nungi 1996 küm tashi pa North Paravur constituency nungi MLA liasü. Pa Kerala Assembly Committee on Estimates (1998-2001) nung Chairman inyak, AIYF Ernakulam district committee nung Tir inyak, CUSAT Senate nung züngsem liasü aser AITUC Kerala State Council nung tatong Tir inyaka liasü.

Pai pa kinüngtsü, B Lathika Kumari den jala ka toktsür asü.



February 27, 2025 nü New Delhi nung European Commission Tir, Ursula von der Leyen agizükdang tangokba noksa nung angur. Kasa noksa nung Union Minister of State, Anupriya Patel-a angur.

Melungnen O



ASOBA :
9th Nov. 1947

ASÜBA :
20th Feb. 2025

Asür Alikala Lkr

Onoki Kodanga amatoktsu makokba temeim ojala Alikala (Longkong) Kibubai lemsüzükba arishi anogo tembanger 20-02-2025 anogo nung Alima nungi pilaogo. Onok mangyim tejashi temulung zürep tia nung alidang kwikati Sarasatem, nubu, rongsen, aser temeim agi yaretepogo nenok ajak dang pelaba lemsateper.

Nenok ajak dangi tsungdong marutetaka, teyanglur Tsüngremi nenok ajak lepa moajang ta ozüi sarasademtsür.

~ Temeim Kinungbu Chirnur, Semchirtem
aser anükapang.



ALL INDIA INSTITUTE OF MEDICAL SCIENCES
NEW DELHI
Nursing Officer Recruitment Common Eligibility Test (NORCET) 8
Notice No.34/2025 Date: 24.02.2025
www.aiimsexams.ac.in



Online Application is invited for the Nursing Officer Recruitment Common Eligibility Test (NORCET) 8 for the recruitment of Nursing Officer posts at Level 07 in the Pay Matrix pre-revised Pay Band-2 of Rs.9300-34800 with Grade Pay of Rs.4600/-, Group-B for AIIMS New Delhi and other AIIMS as per available vacancies in the respective Institutes.
The On-line applications can be done through AIIMS web site www.aiimsexams.ac.in from 24.02.2025 to 17.03.2025 up to 5:00 P.M.

Eligibility Criteria for appearing in NORCET	
Essential Qualification	
I	a. B.Sc. (Hons.) Nursing / B.Sc. Nursing from an Indian Nursing Council/state Nursing council recognized Institute or University OR B.Sc. (Post-Certificate) / Post-Basic B.Sc. Nursing from an Indian Nursing Council/State Nursing council recognized Institute/ University. b. Registered as Nurses & Midwife with State / Indian Nursing Council
OR	
II	a. Diploma in General Nursing Midwifery from an Indian Nursing Council/State Nursing council recognized Institute / Board or Council b. Registered as Nurses & Midwife in State / Indian Nursing Council. c. Two Years' Experience in a minimum 50 bedded Hospital after acquiring the educational qualification mentioned above as applicable for all Participating AIIMS. Remarks - The required two years of experience as in above is as an essential criterion and to be valid, the experience shall must be acquired after obtaining Essential Qualification, i.e. after completing residency period of the course, declaration of result & registration with State/Indian Nursing Council.

Age Limit: For all AIIMS: Between 18-30 Years. (As per detail on Age relaxation given in General Conditions subject to age Relaxation as per Recruitment rules of respective Institutes/Hospitals.)

All age shall be counted on the last date of closing of application form.

APPLICATION FEES:
A) General/OBC Candidates - Rs.3000/- (Rupees Three Thousand only)
B) SC/ST Candidates/EWS - Rs.2400/- (Rupees Twenty-Four Hundred only)
C) Persons with Disabilities - Exempted
The candidate can pay the prescribed application fee through DEBIT CARD/CREDIT CARD/ NETBANKING. Transaction / Processing fee, if any, as applicable, will be payable to the bank by the candidate.
Application fee once remitted shall not be refunded under any circumstances.
Applications without the prescribed fee would not be considered and summarily rejected.
Application Fees of SC/ST candidates who appear in the Examination will be refunded after declaration of results in due course of time after verification SC/ST certificate to be uploaded at a later stage.

Online (CBT) for Stage I: NORCET Preliminary, Date: 12th April, 2025 (Saturday),
Online (CBT) for Stage II: NORCET Mains, Date: 2nd May, 2025 (Friday)
Please visit AIIMS website www.aiimsexams.ac.in to apply online & for latest information.

CBC - 17112/11/0060/2425



TIR YIMYIM YIMOBILEM (EDITORIAL)

DIMAPUR FRIDAY, FEBRUARY (TSÜKLAI) 28, 2025

ABAM meyong Cannan farm !

Tuli anasa Kangtsüung nung lushi nung Ao Baptist Arogo Mungdang (ABAM) meyong alushi tuluka lir. Iba alushi ya tamalen Kangtsüung yimteni ABAM nungdak nung amshitsü tenla agütsüba tesem tajung ka lir. ABAM-i iba tesem dang ya "Resource Center" ta ajar. Atangji, ABAM asoshi 'Resource Center' ta asüba tangatetbaji kechiar ABAM nung lenirtemiang meteta alitsü, ajisüaka asenoki angatettsü agi, 'Resouce Centre' nung jagi nübortem asoshi nungdak aser teyari agütsütettsüsa terenemba sentong balala alitsüa akok. Tang tashi nung iba tesem nung ABAM-i ak aser ango metsüba angazükogo aser rubber donga karbo tema lir. Ajisüaka, item mapatemji tajangzük asoshi inyaker asü mesüra mapa inyak sayutsü asoshi inyakba sentongar teinyakertemi dang metettsü. Ashiko, iba resource center indang ya yangi inyakertem den ABAM lokti mungdang nung adenertemi dang tera meteta alitsüa akok, kechiyong ABAM küm tatem mungdang shia 'resouce center' indanga osang agütsür. Tamalenbo iba tesem dang ya ABAM farm ta ka jaya liasü südi. Atangji, ABAM ya arogo telongjem tentet ka dang lir, anungji tanela tsütsü ajungshitepa inyaksüba dak alaka, ashiko, senotsü ajangzüksüsa 'farm' lapoka anepalubo mesütettsüa akok. Iba jagi iba tesem ya mapa inyak sayudak aser angazükdak tesem ka akümtsü nükjidong nung resource center jatsü südi ta bilemer. Aji oda, arogo nungersa süaka aikati iba tesem ya ali asü maliar memeteti aliba mapang ka, tang ABAM aser Mokochung Ao Officers' Telongjem na longjemer arogo nung tenzükertem dang mapa inyak sayuba sentong ka ABAM Resource Center nung akaba osang angashidang pelar aser iba ama sentongji tanen makai agiyonga aotsü imlar. Atangji, mapa inyak sayutsübaji arogo nung toklang tenzükertem dang nungibo arogo nung nütsüung nebortemang tenüngdakba asütsüa akok. Aji oda, ABAM Resource Center-ji taküm nungdak angulen lenmang sayudak dang masü saka tanela nung tashi itshidak tesem ka küma amshitsü asoshia ABAM lenirtemi bilemdanga alitsüa akok. Mapang kabo, iba tesem ya South Korea nung tenzükba "Cannan Farmers' School" küma amshitsü asoshi Korea nungi dena aruagi long azünga sentong ka agiba bilemteter. Iba school-ji lapoka meliaka Cannan Farmers' school lapoktsü atema azünga lungjibo ano akangakanga azünga alitsü imlar. Iba ama alu ayimba, shiruru metsüba aser jenjang aketba süngdonglidong aser naro tema anepaluba mapatem sayudak aser angazükdak küma asenoki Korea nung dang nungi meranga inyakba jakla aser tangatetba bener aruagi tenzükter asübo, atangji, ABAM Resource center tesem ya 'Cannan Farmers' School' tajung ka kümer lila. Atangji, iba school tenzuka aotsü atema temenu mali, tangsa tenüngdakba, anungji ano khen asentenshir Korea nungertem den to tongtepratep tenzükshitsüla aser mapa küma aotsü asoshi shitakba iba school nungji aluyimer kümer sayutsü purtem kar Korea tashi asüyonga yoker, iba school sentong aser inyakyim angazüker arutsü kanga nungdaka repringteter. Atangji, ABAM Resource Center nung ya Cannan farmers' school-ji tenzükong, ano tanü tensa den apet lanurtem dang mapa sayuba aser angazükdaksüba sentong balala mapang-mapang shia ayongzüka katettsü. Itemji, tang amaji, government nung inyaker 'officers' den longjemer kanga junga inyaktettsü. Item ama arogo nung taküm nungdak sayuba aser anepaluba sentongtem takok ngua inyaksü asoshi ABAM nung "Skilling Program Co-Ordinator" ka laishir nungi masü saka 'secular' nungi aluyimba aser shiruru metsüba mapatem nung junga züngtetba nisung ka shima mapa tenzüksü nungdak repringteter. Atangji, ABAM nungsa süaka ketdangsertem ajak laishir nungi agitsü ta bilemba tangatetba nungi asenoksasa salar, ABAM tir, ABAM meyong rongsen aser senotsü ketdangser aser ano tang ABAM Resouce Center aser Cannan Farmers' School mapatem anepalutsü purtembo mapa dak apet temetetba, tajangshiba aser tangatetba alir 'secular' azüngertem nungi agi tajungba asütsü.

OLEMSABANG

TAMANGER TAJUNG KATI KODA ARTIFICIAL INTELLIGENCE ANGATETTSÜ

~ Akok Amer, Pastor: Impur Baptist Arogo

(Yashi adok nungi...)

Laishiba Ajanga AI Indang Kechi Ashir

AI ajanga asen kiboki aitogo asen tamangba yimsü nung kongshir, arogo telongi aitta lir (church technologies). Iba AI melira tanü virtual sentongtem, aser asen ket nung aliba screen technologies koba ajanga asen nem teyari agütsür ajak yagi aseni bilemba ama instant (tang-tang) kecha magütsütettsü. Asen bilemba mataloktsü. AI tanübo asen putu nungbo mali ta masü saka asen atepzüng nung lir. Tamangertemi süra kechi inyaksüla?

- * Tsüngrem dak tang temulung leman
- * Tangar dak (including programed machine) metaloker aliba shisatsü malitsüla
- * AI ajanga ashiba ajak amangtsüla ta masü. Kechiyong meimchiri program süa toktsü oset ka dang lir.
- * AI-ji Yisu Khrista masü, AI ajanga tekümtet magutsü.

AI Tajangzük kar (Advantages)

AI sentong ajak tamajung ta masü saka iba ajanga asenok nem teyari aika agütsür:

1) **Meimchirtemi Aibelentsü Alibatem Ajemdaksür (Reduction in Human Error):**

Meimchiri aibelener aser ajaki metet. Kechiyong tabensaba aser temetetba nung shinga maso. Saka computer program koba kanga junga aibelen makai meimchirtemisa programmed süa ayuitem ajanga aseni aginüba ama telangzüba shitak agütsütsü akok. Meimchirtanü inyakba sünga asüngbo amar nungabelentsüji ana nung dang lir.

Example: Tsüngsang mopong ajak tanü asen ket nung aliba AI ajanga shitak agütsüteter.

2) **Timtem aser lendong aketba mapatem koba meimchiri meinyakteter itemji AI ajanga inyakteter:**

Mapa kar meimchiri meinyaktetba, anüng nung satellitestem, Mars nung AI robot ajanga data bendenba, kong bomb lendong lir, kong nisung ajanga meinyakteter item jagi AI ajanga mapa tulu inyaker. Tanü raratsü asoshi nisung motetba tesemi AI (Drones) ajanga rarateper. Tzüyim telungi nisung masü saka AI machines ajanga taginüba mapatem inyaker

3) **Mapang 24x7 Ajak nung alir:**

Meimchirtemi talangtiba agianogo nung konda 5-8 inyaksü akok. Saka roboti mapang telemsa kecha memetet pa meraksa tashi inyaksü akok.

4) **Tekaritaba telemtet Agütsütsü akok(Faster Decisions):**

AI technologies ajanga nisung kati telangzüba magütsüdang langzütsü akok. Tatishitsü agi, asen gari nung lenmang sayuyim (navigation) aseni memetetba lenmangtem pai sayur. Asen gari nung tiremopung ajema aliba sünga sayur, sensor, camera aser ibala mesükba ajanga tekaritaba nung asen dashboard nung sayur alir.

AI ajanga na asen phone aser computer nung ajena (type) nungdakba bushitsü melena tanübo voice assistance 'Siri' aser 'Alexa' ajanga agütsüteter. AI ajanga asen ola angateta tetezü ajak noksa nung aser tezüluba nung tanüasen nem agütsür.

5) **Medical Teyari**

Taoba putu nung meimchir temetetba aser ashiba yari tashidaktem puteta liasü tanübo AI technologies ajanga tashidak putetba kisung masü saka operation tashi agitsür.

AI Ajanga TajangzükMagütsüba Kar (Disadvantages)

1) **Rongsen kanga lalur:**

AI programtem anogoshia update asür (hardware-software) anungji asen ket nung aliba mobile handset/computers/gadgets balala ajak spaces temadoker asünung RAM aser storage tulu aliba mapang shia melentsüsa akümer. Program maintain asütsü asoshi rongsen jenti nungdaker.

2) **Meimchir AzümesenKümdaksür:**

AI dak dang metaloker alir asünung, pei akokba aser shia aliba ajak toktsür automatic applications aser AI response nung temulung lema azümesenteper. Tanü kaketshirtemi aiben pei temetetba nung tesayuri agütsüba lesson nung masü saka google ajanga assignments ajak inyakteper. Sayutsungiri pei lai lapoka sarasadema Tsüngrem O zülur masü saka google nung zülua aliba ajenzüker tangar ajanga pei oshi nung meyipzüker sayutsüngiteper.

3) **Mapa Mangur:**

AI robots temi mapang ajak nungloksüba mapatem inyaker asünung, nisungtem joko mapa mangur. Ayangdak mali, pei inyaktetba mapatem roboti melena toktsü. Aluyimtsü tashi roboti tanü alu alar. Anungji, unemployment alima sünga kümogo.

Conclusion

AI ayimsünga aoba putu ka nung item technologies ajanga asen nem tajangzüka aika agütsü aser ano timtema bener arutsür. Iba telatet tesem ka mesüra lokti ka dak dang ataloker ta masü saka kija taküm, kibong, lokti tentet ajak aser arogo aser tamangba yimsü tashi nung kongshir. Iba AI ajanga asen tekümtet mesamatsü merangtsüla, Iba AI ajangaTsüngremer kotak yimli yangertettsü sa koda kümdanga shisa ka amshitsü teti sarasadema tajung len shisadanga amshitsü kanga tongtibang. Paul shiti**Efesa 5:15-16** nung ya shia lir, ¹⁵"Anungji nenok koda jajar kümdanga repringang, shisa makaba ama masü, saka shisa akaba ama jaja-ang. ¹⁶Mapang tajung ajak alangzükang, kechiyong anogotem tamajung lir."

Asenok ajak kanga kümdanga sarasadema iba AI putu nung alitsü merangti. Tsüngrem mesendoktsü, pa tashi aser temetetba den metokteptsü, pa tekümtet Yisu Khrista ajanga dang ta züngzünga agizükti. Kechiyong temetetba tashi aser ain ajak AI ajanga masü saka Tsüngrem ajanga dang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh nung Hindutva lenir kati Khristantem amokmerener



Manipur nung Khristantem amakdang rongdoktsüba Laishiba terongtu noksa nung angur.

February 27, 2025: Chhattisgarh state nung Hindutva lenir kati Khristantem amaktsü atema yimjak nung ayongzükogo; March 1 nü Chhattisgarh state kübok yimtsüng asem nung Khristantem amaktsü pai ayongzük.

Nisung ka tenüng agi, Aadesh Soni-i Hindu nungertem dang Bishrampur, Ganeshpur aser Jhanakpur yimtsüngtem nung Khristantem amaktsü, tashiyim amshia raksatsütsü aser tepsettsü tayongzükba agütsü.

Soni-i pa ya Chhattisgarh nung life coach ka, communication trainer ka, sangro zülur ka aser kaket ken o zülur ka ta pasasa sangdong.

Soni-i social media ajanga Hindu nungertem dang Khristantem ajak tepsettsü, tetsürtem tashiyim amshia raksatsütsü, Khristantem meyong ki kakkoka atutsü aser ajak tepsettsü atema tayongzükba agütsü.

Paisa pa indang 'followers' dang March 1 nü Khristantem amaktsü atema nisung 50,000 bosa ayongdenang, ta metetdaksü.

"Administration-ia ni pusemer, anungji ni asoshi ibaji teperi," ta pai ashi.

Ajisüaka tang tesüsa Soni-i pai pa indang social media accounts, talisa Instagram ajanga item amokmeren osang meprok ta ashi.

Osang tejangja memeteti Chhattisgarh Christian Forum nungi Arun Pannalal-i taila osang proker, ta Soni-i tai tongloksü.

Soni-i, "Nashishi ayokertem kümzüksü atema Pannalal-i tiyazü nung kü nem tai tongloksü," ta metetdaksü.

Soni-i, pa leniba nung nisung 5,000 item yimtsüngtem jagi aotsü saka parnok kecha masütsü, ajisüaka parnok jashidaktsüra parnok amaktsü, ta metetdaksü.

Iba dak sendakba nung

Nagaland Baptist Church Council (NBCC)-i shidi ka ajanga Chhattisgarh Chief Minister, Vishnu Deo Sai dang, "Religious Parliament" sentong nung tesempa o jembibaji tebilemsü onük tuluka lir, ta metetdaksü.

NBCC-i, "Tesempa o jembiba osang tejangja angashia onok jashir" ta metetdaksü.

NBCC-isa Chief Minister dang March 1 nü 'Morcha' sentong ayongzüka lia lendong nokdangtsü atema inyakdaksüner, ta mepishi.

Osangbener den jembidang Raipur nung Archbishop Victor Henry Thakur-i, "Aadesh Soni-i tesempa o jembibaji ajaklen prokshiogo, anungji iba tesem nungji lendong atalokra ibaji memeteti atalokba masütsü, saka administration tamakok ajanga asütsü, aser administration-i metetsümonga atalokdaksüba lendong asütsü. Iba ama tensa ka adokra Chhattisgarh state sorkar khuret asütsü. Tang tashi nungbo sorkari Aadesh Soni anema kecha meinyak," ta metetdaksü.

Ano külen Soni-i, "Chhattisgarh state nung nashi tepsetba nokdanger aser Hindu yimsü nung nashi ya temeshi shiruru ka lir, ajisüaka Khristantemi nashi tepseter," ta metetdaksü.

Facebook post ajanga Soni-i Prayagraj nung S h a n k a r a c h a r y a A v i m u k t e s h w a r a n a n d Saraswati-i jembiba o tetshia lir. Saraswati-i, Hindu nungertemi Khristantem ajak tepsettsüla, ta sangdonga liasü.

Chhattisgarh Christian Forum nung Tir, Arun Pannaalal-i, "Right wing teloktemi Aadesh Soni pusemer, aser pa adenba telok nung A v i m u k t e s h w a r a n a n d Saraswati nungera densema lir," ta metetdaksü.

Ano külen Association of Concerned Christians (AOCC)-ia Vartaknagar Police Station

nung Soni anema ken o ka benokogo.

AOCC secretary, Melvin Fernandez-i, "Pai (Soni) jembiba o ajanga Khristantem melungjang yirutsüogo. Iba ya linük temzüng kübok secularism aser yimsü temeden anema lir. Item ama o jembiba ajanga loktiliba nung tesünep raksatsütsü aser rara adokdaksütsü," ta metetdaksü.

Khristan lenir, Vishal Mangalwadi-ia yimjak nung shidi ka ajanga Ato kiloner, Narendra Modi dang tiyongsüi ia inyakdaksüner ta mepishiogo.

Vishal-i, "Item ama amokmeren ya zübazüba yutsütsüla masü, kechiyong linük Tir, Murmu indang taoba constituency, Mayurbhanj nung tamalen (missionary) Graham Staines aser par jabaso ana rongseta südaktsürtemia parnok nashi kümzükertem ta jembia liasü," ta metetdaksü.

Tesüiba küm ishika tsüngda India nung minorities, talisa Khristantem aser Muslim nungertem anema inyakba kanga bulua akümer. 2024 küm kija nunga India nung Khristantem anema inyakba tatalokba 834 liasü.

NBCC shidi ajangasa linük nung yimsü temeden wazüka ayutsü aser nütsüng ajema alirtem kümzüksü nüngdak, ta metetdaksü.

Kasa shidi nung yamai shia lir, Soni-i jembiba o nungji asalentong yanglurtemji Chief Minister aser state ketdangsertem ta shia lir, anungji Sai-i item ama o nungjagi pilatsüla aser Chhattisgarh nung yimsü balala amangertem ajak asoshi lenir ka ama inyaktsüla, ta metetdaksü.

NBCC-isa Chief Minister dang March 1 nü Morcha sentong ayongzüka lia tensa raksaba nokdangtsü atema tangsa telemetba agia inyaktsüla aser ajak nem security agütsütsüla, ta mepishia metetdaksü.

ANOGO ABEN TSÜNGREM DEN

Ochi dak aliba

"Kechiaser ochi onok dak lir aser teti onok dak alitsü" 2 Yohan 1:2

Asen Kibuba Yisu Khrista dak alema tanga ochiba kecha mali. Pai ashi, "Ni ochi, lenmang, aser taküm". Yh. 14:6. Pai ochi taküm, ochi libaliro, ochi o aser ochi osang sayu aser sangdong. Yohan mapang nung ochi osang nungji anak tudaktsütsü merangba tatidang kar liasü.

Yohani sangoktsüba temoatsü balakaji "Ochi asenok dak alir. Ibaji temoatsü adokdak aser jenokdak ta ashi. Kodang asenoki osang tajung dak amanger idangji Khrista asen taküm dangi arur aser aseni ochibaji meteta akumer. Saka pa asen dangi arudaktsutsübaji asenok teinyaktsü mapa. Asenok koda alir? Asenoki ochi nung jajadar ma? Tashi anga-a mapa ajak ochishi inyakdar ma ?

Temenen ajanga mesüra tashi mangaba ajanga asenoki ochi samadaksür asü? Temenen tatidangji anogo shia asenok den alitsü, saka itemji kokteta ochi den akanga sota alitsübaji asenok teinyaktsü. Khrista shiba ochi lir, Pa dang asenoki angadi, Pa nungi angazükdi, Pa meimdi, Pa dak metalokdi, aser iba nung lidi. Süra asenokji ochi pukümer kaka sütet, ibaji ochi dak aliba ajanga dang inyaktet.

Somayeh Rajabi

February 26, 2025: Tawa Iran Islam yimsü toktsür Khristan nung Islam yimsü toktsür Khristan yimsü agizüker nisung 80 shi tekülem sentong agia aliba mapang nung Iran ketdangsertemi parnok mita aruba sülen Somayeh Rajabi puer ao, ta International Christian Concern (ICC)-i metetdaksü.

Gatab nung Khristantemji tekülem sentong agia aliba mapang nung Islamic Revolutionary Guard Corps (IRGC) aruba sülen Khristantem ket nungi Laishiba, phone aser kongki tapu balala apuba den külemi Khristantem tekong nungi Kangki azük tokzükja liasü.

IRGC-i Rajabi puer aoba sülen anogo ka lir sülen ang lar kinüngertem den jembitsü atema la nem temelaba agüja liasü. Lai phone ajanga lar kinüngertem dang la Sari jila nung tepuokdak lir, ta metetdaksü.

Iran nung Khristantem kanga reshikangshir, talisa

Islam yimsü toktsür Khristan yimsü agizükertem kanga reshikangshir.

Iran ya Islamic republic linük lir, anungji sorkar ozüng ajak Islam aser Sharia ozüng den sendaktepa lir. Iran nung ainkar Muhammad mezüngmeshirtem mesüra Islam yimsü atalartem nem tasüba temerenshi obendang agtsür.

International Christian Concern (ICC) indang Global Persecution Index report ajanga ashiba agi, Iran nung Ministry of Justice-i linük security raksatsüba nung ajemdaker Khristantem nem tai tonglokja Khristantem apur aser ken o junga mangadangi tepuokdak mapang talangka puoker aser tepuokdak alidang kanga reshikangshir.

ICC staff kati, "Iran nung Khristan nütsüng maneni arener. Khristantem den tanga minorities anema inyakba nokdangtsü ketdangsertem tebilemba mali," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Teko**

(n) ojala teti tenu nunger dang ajaba (maternal uncle)

* Kü kinungsüi teko nungertem kanga meimer.

Tekokru

(n) angüma lur alitsüsa akümba (hunched, bent)

* Nisung tar talang pur aika tekokru akümer.

OLONG PAITEP # 7076

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S ___ i
9. Nisung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Majinü
13. Tzüma nung senzüba

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7075 TELANGZÜBA**TIPIEN :**

2. Bangsemo, 6. Tiptem, 8. Jen,
9. Talila, 11. Aren, 12. Tzübo, 14. Alia,
16. Angati, 17. Odi, 18. Azü,
19. Sünglang.

LANGTSÜNGLEN :

1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

NAI-A YA METETTER MA**ALIMA NUNG TIMTIBA AYOKBA KAKET 10**

1. The Bible
2. Chairman Mao Tse-Tung quotations (Little Red Book)
3. The Quran
4. Don Quixote by Miguel de Cervantes
5. A Tale of Two Cities by Charles Dickens
6. The Lord of the Rings by J.R.R. Tolkien
7. The Little Prince by Antoine de Saint-Exupéry
8. Harry Potter and the Sorcerer's Stone by J.K. Rowling
9. And Then There Were None by Agatha Christie
10. Dream of the Red Chamber by Cao Xueqin.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Mizoram-Assam arrtsü atema sensaksem March ita akatsü

Mizoram aser Assam na arrtsü nung mangatettep aliba ken o sensaksem official-level nung March ita tatemlen tenzükshitsü.

Guwahati, Tsüklai/February

27 (Agencies): Mizoram aser Assam na arrtsü nung mangatettep aliba ken o sensaksem official-level nung March ita tatemlen tenzükshitsü imlar.

Ajisüaka ministerial jenjang nung sensaksem March 31 nü agitsü sentong yanglur aliba ya thinentsü akok, ta Mizoram Home Department ketdangsür kati Bohdbarnü metetdaksü.

Mizoram Home Secretary Vanlalmawia-i ashiba agi, Guwahati nung March tatemlen bureaucratic-level sensaksem ka aktsü atema Assam-i Hombarnü osang yokogo.

Mizoram-i ken o ya asadangdar aser telemtetba ka agiba sülen telangzüba agütsütsü.

Assam-i benokba onük ya agizükra Budget Session March 20 nü tembangba sülen sensaksem atema anogo lemtettsü.

Vanlalmawia-isa, senden mamen tsüngda state ana prongla nungi ketdangsürtem ajurutepa ministerial sensaksem asoshi onük aser framework sensak asemtsü Mizoram-i benokogo, ta ashi.

Sensaksem takok ngua akatsü atema jelia tongtibang onüktem renemer atatsü nükjidong nung iba ya benoka liasü.

Ajisüaka Mizoram-i taoba mapang official-level sensaksem ayongzüka agitsü merangaba Assam-i kecha telangzüba magütsü.

State ana tsünga tatemsa minister jenjang nung sensaksem 2024 küm August ita 9 nü Aizawl nung agi, aser iba mapang state anapronglai yimjung nung alitsü lemtepa den mangatettep adoker aliba tesem nung lendongtem nungi jenboa alitsü atema jenjang agitsü mulungtepa liasü.

State anapronglai taruba

senden 2025 küm January 31 nü tashi nungbo agitsü mulungtepa liasü. Ajisüaka Mizoram-i mepeshiba Assam-i kecha telangzüba magütsüba ajanga menomeyanga arudar.

Mizoram aser Assam na arrtsü nung mangatettep ya 1875 aser 1933 küm ta colonial-era demarcations ana nungi adokba lir.

Mizoram-i ashiba agi, 1873 Bengal Eastern Frontier Regulation (BEFR) dak ajemdaker square-mile 509 talang Inner Line Reserved Forest (ILRF) ya parnok litsü nung lir.

Ajisüaka Assam-i, 1933 Survey of India map ya temzüng ozüing kübok arrtsü lir.

Liyonga aodang ILRF ya tulu ka Assam-i aziükogo. 1933 demarcation nungi ali shilem kar Mizoram kübok lir. Arrtsü ya officially lateta maliba ajanga mangatettep adoker.

Assam: Patacharkuchi revenue officer mapanungi anentsü**Pathsala, Tsüklai/February**

27 (Agencies): Assam sorkari Bajali district nung Patacharkuchi Revenue Circle Officer Masum Yusuf Ahmed mapanungi anentsüogo. Pai service rules anema inyaksangshiba atema mapanungi anentsüogo.

Official order ka ajanga ashiba agi, Ahmed ya full-time sorkar tenzüker ka, saka pa

tanga private mapa-a inyaka liasü, koba Assam Civil Services (Conduct) Rules, 1965 anema lir.

Chief Minister indang Special Vigilance Cell-i bushisüngdangba sülen ken o ya tema adoka aibelener merenshiogo.

Chief Minister indang Special Vigilance Cell-i ashiba agi, Ahmed ya sorkar tenzüker

ka saka pai tanga private mapa-a inyakba atema pa mapanungi anentsüogo.

Assam Angh-i, public service tejangraba dak ajemdaker Ahmed ya mapanungi anentsütsü langla lir ta asatetogo.

Pa mapanungi anentsür aliba mapang Guwahati nung department indang headquarters nung dang alitsü.

Manipur: Kuki nunger volunteer 6 apu**Imphal, Tsüklai/February 27**

(Agencies): Brehostibar anepdang security forces temi National Highway-102 (Imphal nungi Dimapur) nung Kanglatombi aser Kangpokpi na tsüngda Gamlipai nung ozüing alema check post aser bunker yanglur aliba raksatsüba den Kuki nunger volunteer trok puogo.

Police osang ka ajanga ashiba agi, iba check post aser bunker raksatsüba anema Kuki-Zo nungertem aika adenshia longkak aitba sülen security

forces-i item nisungtem pua liasü.

February 13 nü Manipur nung President's rule benokba sülen tang mezüngbuba Kangpokpi district nung nisung puogo.

Meita aoba sentong ya 4 ako nung tenzk aser 9 ako meta bulldozer kati ozüing alema amenoka aliba check post aser bunker raksaja liasü.

Manipur nung kin o kin tsüngda azütokshi lendong tenzüka sülen iba check post aser bunker ya amenoka liasü.

Ajisüaka ozüing alema inyaksangshirtemi iba check post ya ita aika garitem nungi ozüing alema saru sarutsü atema amshia liasü, ta osang ajanga metetdaksü.

Highway nung gari kecha tetsükdaksü makai senzüdaksütsü atema Manipur nung security forces-i iba jenjang ya agia liasü.

Security force temi apuba nisungtem ya local police station nem bendanga agütsüogo, aser temzüng ozüing dak ajemdaker jenjang agitsü.

Yunus yimsüsüba nung Bangladesh army tekolakba temulung masür

Dhaka, Tsüklai/February 27 (Agencies): Bangladesh army tekolakba ya Muhammad Yunus-i aniba sorkar nung temulung masür aser mepelar amai angazüker.

Itdangiter osang kar ajanga tang yimsüsür dak sendakba nung Bangladesh army telungzük nunga meputep adoker amai ashir. Temulung melemtepba lir aser sorkari tamang makaba aser linük indang temzüng ozüng tsütsü tebilemtsü lir, ta parnoki ashir.

Tongtipangsang army tekolakna Waker-uz-Zaman ya senzüka yutsür amai angatetba ya lir.

Waker-uz-Zaman ya Sheikh Hasina mapang shim aser la den tesendaktep tajung liasü aser nisung telok kar kanga junga azüok. Par kibong ya taoba administration den kanga junga sendaktepa liasü, kong pa kinungtsü ya Hasina'er kinunger aser kinungtsü tebu ya army chief 9 buba ama inyaka tesendaktep tali akangshi.

Army tekolakba inyaksangshi kanga junga meteter osang kar ajanga Yunus sorkar nung sadoksayim masüba tali akumba sayu, aser tawa ISI tekolakbai Dhaka semdangba ya tatishitsü ka lir. ISI tekolakbai Bangladesh army nung Quarter Master General (QMG) Lt Gen Muhammad Faizur Rahman den ajurutepba ya Waker-uz-Zaman tashi alema aoba amai angateter. Rahman ya seniority tsütsü jenjang pezü buba nung lir.

Waker-uz-Zaman yagi democratic yimya nung amangba nüburtemi meteta lir aser pa ya sorkar indang adviser ka ama inyaka liasü. Paibo tekeraba nung elections aginür ta osang ajanga ashir, aser Bangladesh Jamaat-e-Islami aser danga extremist factions nungi nüburtem mashi lenmang nung anisatsü akok ta tebilemtsü lemsatep.

Ano linük nung tayongzükba balala ajangshidang mitkari mapa meinyakba ajanga tenüng menükogo ta army tekolakbai amanger. 2024 küm Yunus malidang pai 2025 general election agitsü sangdongba ajanga pai election aginüba sayur.

Ano tensa tali tamajungba kumdaktsübaji Yunus sorkari political party tali adokdaktsütsü tasa yanglur aser kaketshir anir 'political formations' asoshi ajungshir ta angatetba aser bilemba yagi lir. Iba ya nübur tali telemsa adokdaktsütsü tasa ka amai ajiteter, kechiaser linük balalai ajungshia Yunus-i sorkar kumtetsü asoshi lenmang lapoktsütsü.

Political proxies ajanga Pakistan army-i teka amoshitsü ama army temi bilemer, koba senior commanders temi khenyongi memulunger. Lt Gen Muhammad Faizur Rahman ya Bangladesh army chief tasenba ama shimtsü amai ajitetba ya tebilemtsü tulu lir, shiba Islamist aser radical ka ta züngshir aser Pakistan army-ia pa aginer ama angazüker.

Hamas-i agütsüba tasümang Israel-i jangjaogo

Jerusalem, Tsüklai/February 27 (Agencies): Bodhbar aonung sentong kecha magie Hamas-i tasümang süngden pezü Gaza nungi Red Cross nem agütsü. Item süngden nung Shlomo Mansour (86), Ohad Yahalomi (50), Tsachi Idan (50) aser Itzik Elgarat (69) tasümang lir ta kanunger aser külemi alirtemi Brehostibarnep jangjatsü.

Item tasümang agütsüba ajanga Palestine nunger tepuodak alir aser pua alir 600 dak tema chioktsü menuba atema lenmang lapoktsü.

Ibai hopta trok Gaza ceasefire tezüngzüktep noklem mezüngbuba nung nisung melentepba tatembangba alitsü aser iba sülen kechi ataloktsüar memetet.

Hamas-i noklem tanabuba atema menur süaka jembishinü tenzüksü renema lir ta ashir, koba ajanga rara tembangtsü aser tanüngba Israel nunger hostages tem chioktsü nükjidong lir.

Ajisüaka Israel ato kilonser-i tang aliba ceasefire ya atsülangtsü meranger, shiba dang par political allies temi rara tenzüka Hamas samatsütsü ajungshir.

Hamas-i October 7, 2023 nü Israel maka nisung 1,200 shi tepseter ano nisung 251 pua bener aoba nung telangzüba agüja Israel mitkari Palestine nunger telungpur telok samatsütsü military campaign tenzük.

Iba sülen Gaza nung nisung 48,348 tepsetogo, ta yangji Hamas meyong health ministry

ajanga ashir.

Gaza nung nütsüng yongsük 2.1 million liasü saka timba aiben pei ki yutsür tesem balala nung prokshi, ki o jen shilem 70 jungnüa raksatsüogo mesüra samatsüogo, healthcare, tzü, sanitation aser hygiene system raksatsüogo aser yangji chiyongtsü, totzü, mozü aser jenokdak tesem agi anünger.

Brehostibarnep Hostages and Missing Families Forum ajanga sangdong ka nung Itzik Elgarat, Tsachi Idan, Shlomo Mansour aser Ohad Yahalomi nunger tasümang jangjatetba indang mangyim tejashi lemsatepa liasü.

"Nisung 59 tang tashi parnok ket nung lir aser parnok chioktsü anogo mejangjar. Telemtetba agir ajunga dang pua alir ajak agreement indang anogo 50 buba tashinung chiokdaktsütsü ajungshir," ta ashi.

"Pua alirtem asoshi mapang mali, parnok kinunger tem den tanaben lungjemtsü mesüra akhum agüja aremtsü atema anir arutsüla."

Tsachi Idan ya Nahal Oz nung par kidang nungi Hamas temi October 7, 2023 nü pua bener ao. Par jabaso tambosang Maayan ya küm 18 jungli liasü, shiba iba lendong nung khaset.

Itzik Elgarat ya Nir Oz nungi pua bener ao aser amakba mapang tekolak nung akha ta osang agi ashir. Pa indang phone ya iba lendong atalokba sülen Gaza nung oa aliba jangjatet.

Ohad Yahalomi ya Nir Oz nungi par jabaso arishi küm 12 tain Eitan den külemi pua bener

ao aser November 2023 nung hopta ka ceasefire alidang par jabaso ya chioka liasü.

Iraq nung asosang Shlomo Mansour kinunger dang pa ya October 7, 2023 nü Kibbutz Kissufim nung Hamas-i tepset aser tasümang ya hostage ama Gaza-i bener ao ta ita tetenzüklen Israel mitkari metetdakja liasü.

Hamas-i tebur pezü tasümang ya Bodhbar aonung taoba mapang ama sentong kecha magie meyipa agüja liasü.

Israel ketdangsür temi Israel-Gaza arütsü anasa forensic tendang aser iba sülen Tel Aviv nung aliba forensics laboratory kati yoka liasü.

Taoba Brehostibarnü Israel nunger pua bener aor Shiri Bibas melen Palestine tsür ka tasümang Israel nem amoktsüba ajanga Israel nunger ain adoktepa lia nisung pezü tasümang ya agütsü. Hamas-i aibelena agütsü ta ashi aser iba tasüng Bibas tasümang agüja liasü.

Yimjak nung pua alirtem amoktsüba mapang kanga mejungi anepaluba mechi Honibarnü Israel-i Palestine nunger tepuokdak alir nisung 600 dak tema chioktsü aliba mapang thinena liasü.

Ajisüaka Egypt nunger tetsüngtai ia jembir temi nisung melenteptsü jembizük.

Iba ceasefire ya atsülangtsü asü mesüra noklem tanabuba tenzüksü, ano mejangja, kechiaser phase tanabuba atema ita tetenzüklen nungi jembishinütsü aliba tang tashi metenzüki lir.

US-i Ukraine nem security guarantees magütsütsü: Trump



Washington, Tsüklai/February 27 (Agencies): Tongtipang ali rongsen tezüngzüktep ka agitsü asoshi Ukraine Tir Volodymyr Zelenskyy-i Hokulbarnü Washington, DC semdangtsü ta US Tir Donald Trump-i metetdaktsü saka United States-i Ukraine nem security guarantees balaka magütsütettsü ta shiogo.

"Ni security guarantees tali magütsütsü. Iba mapaji Europe nem inyakdaktsütsü," ta Trump-i Bodhbarnü ashi.

Zelenskyy-i Ukraine aser

US tsüngta "preliminary" economic agreement ka renema lir saka yangji Russia den rara tembangtsü asoshi Kyiv-i tongtipang ta bilemba US security guarantees inoka mali, ta taoba mapang shia liasü.

Iba agreement rangben ya hopta tatemlen Washington nung Trump den jembishinüba nung keta alitsü, ta Zelenskyy-i Kyiv nung osangbener senden ka nung ashi.

"Iba tezüngzüktep ya takok tulu asütsü mesüra ola madoki süyitsü. Aser takok tulu ya Tir Trump den sensaksemba dak keta lir," ta pai ashi.

Osang ajanga ashiba agi, iba agreement yagi Ukraine nung aliba tongtipang ali rongsen agitettsü US dang melatsü aser ibai February 2022 nungi tenzüka Russia-i tashi ajak amshia amakba mapang US-i teyari agütsüba melena agütsür ama asütsü.

Aerospace, defence aser nuclear industries amala nung amshiba minerals aika ali telung nung aliba agitettsü asoshi melang ta White House-i Kyiv dang kanga ajungshia arur.

Trump nungi teyari tajung angutsü asoshi Ukraine nungeri merangba nung iba tezüngzüktep ya tongtipang lir, kechiaser pai Ukraine nung Russia-i raraba tekeraba nung tembangdaktsütsü lenmang bushir.

Kyiv nung osangbener den jembidang, agreement rangben ka atema US den framework economic deal ya mezüngbuba mera alitsü, koba Ukraine indang parliament nung tejangjaba lemtettsü, ta Ukraine tiri ashi.

Lenir ana tsüngta hopta ka shi o tamajung shitepa Trump-i Zelenskyy dang "dictator" jar sülen tang US semdangtsü lir.

Trump-i iba deal ya rara mapang Kyiv nem sen dollar billion aika teyari agütsüba menoker ama jembir.

Trump kümsük tanabuba indang US Cabinet senden mezüngbuba Bodhbarnü tenzükdang Zelenskyy arutsü osang sangdong aser iba deal ya tezüngzüktep kanga tulu ta ashi.

"Taoba administration-i asenok jenjang kanga majung nung yutsü, saka asenoki deal

ka yangluteter, kong asenoki sen meyipa angutsü aser tarutsü nunga sen aika angutsü," ta Trump-i ashi.

Paisa NATO military alliance nung Ukraine adentsü teimla maliba shisem.

"NATO - nai amadoktsüla. Iba mechi ajak ya tenzük ama nibo bilemer," ta Trump-i ashi.

Ali rongsen atema tezüngzüktep yanglutsü jembishinüba mapang Kremlin-i Trump mesüzüksü meranga pa tenüng asanger aser America nunger dang Russian sepaitemi amokbanga aliba Ukrainian territory nung natural resources nung senotsü indoktsü ajungshir.

Russian Foreign Minister Sergey Lavrov-i ashiba agi, US aser Russian ketdangsürtem Brehostibarnü Istanbul nung ajurutepa linük ana tsüngta mangatettep aliba indang jembitsü, koba Ukraine rara tembangtsü asoshi tongtipang ama ajiteter.

Kasa mapang Russia-i linük tesem ajungalen drones tabu balala 177 amshia amak, ta Ukrainian Air Force ajanga ashi.

Iba mapang Ukrinform news agency indang osangbener Tetiana Kulyk densema tepset ta ashi.

"La anojungi asüba ya külen tenzüker asoshi taoksatsü osang ka lir aser agency asoshi takoksa tulu," ta Ukrinform ajanga sangdong ka nung ashi.

Ukraine nung private energy company tulutiba, DTEK-ia Dnipropetrovsk region nung par indang facility ka raksatsüogo ta ashi.

Ukraine anüdoklen Ukraine sepaitemi Donetsk region nung takok ngua meyiper amak aser iba mapang tongtipang transit artery aser logistics hub Pokrovsk anasa Kotlyne yimtsü agitet ta ahsi.

Russian sepaitemi Kostyantynivka jila tsütsü makyonga otar aser Donetsk region anüdoklen civilian alidak kanga sashia bomb pokloksür.

Russian Ministry of Defence-ia par sepaitemi Russia nung aliba Kursk region nung ano yimtsüng ana agiogo ta ashi, kong Ukraine sepaitemi taoba küm August ita ajungbena maka liasü.

Nagaland nungi badminton asayartemi takok tajung angu



Dimapur, Tsüklai/February 27 (TYO): 3buba Open Badminton Championship 2025 nung Nagaland nungi badminton asayartemi takok tajung ngua gold medal ana aser silver medal pezü ngua liasü. Iba asayamung ya Bhutan nung asaya aser February 25 nü tembangogo.

Nagaland nungi asayar 16 India tenüing nung oa asaya. Asayamung ya Bhutan Badminton Federation-i ayongzüka Phuentsholing Sports complex, Bhutan nung asaya liasü.

Tarep temeyoktep asaya nung Tovali Shohe aser Vikehietuo Kense (India) nati 21-11, 21-19 agi Saurav Biswakarma aser Akansha Pradhan (India) na koka gold medal angu.

Tetsür tarep asaya nung Tovali Shohe aser A Unice Konyak (India) nati Wangmo aser Namgay (Bhutan) na 21-7, 21-12 agi koka liasü.

Tebur tarep asaya nung Joseph VL Ringngheta aser Steven Lalhriatpuia (India) nati Vikehietuo Kense aser Peramrisi Zeliang (India) na

21-19, 24-22, 21-15 agi koka liasü.

Veteran Doubles 50+ asaya nung Singapore nunger tarep Kok Seong Ng aser Kon Fai Foo nati 8-21, 19-21 agi Yekhuvi Achumi aser Yehokhe (India) na akok.

Veteran tarep asaya nung Lalmuanawma aser H Lalanunsiama (India) nati Saku Meyiakum aser Hekato (India) na 21-17, 21-9 agi koka liasü.

Veteran kija asaya nung Lalmuanawma-i (India) Saku Meyimakum (India) 21-10, 21-14 agi akok.

Kevin Pietersen Delhi Capitals mentor kümogo



Tsüklai/February 27, 2025 (Agencies): Delhi Capitals-i Indian Premier League 2025 season atema Brehostibarnü taoba mapang England captain Kevin Pietersen parnok mentor asütsü shimogo. Iba asayamung ya March 21 nü tenzüksü.

Delhi Capitals puri iba osang ya parnok indang social media sabang balala ajanga metetdakja liasü.

Pietersen asaya nungi manen tsüngda taoba mapang Delhi Capitals nungi asayaogo.

Iba mapang club nüngja ya Delhi Daredevils liasü.

Arishi küm 44 tain asayar ya asaya aliba mapang Test 104 nung asaya aser iba mapang pai run 8181 yanglu, kong century 23 aser half century 35 densema liasü. Pa indang average 47.28 liasü.

Paisa, ODI asaya 136 nung run 4440 yanglu, kong century teku aser half century 25 densema liasü. Ano T20I asaya 37 nung pai run 1176 yanglua liasü. T20I nung pa indang average 37.93 liasü.

Kevin Pietersen-i 'switch hit' shot kanga junga asayaba atema pa nüngtugu lir aser pa 2012 season nung Delhi Daredevils nungi asaya liasü. Iba küm pai run 305 yanglu. Asaya ka nungbo pai out mesüi run 103 yanglua liasü.

IPL-2014 nung Pietersen ya Delhi Daredevils indang captain liasü aser iba sülen 2015 IPL nung Pietersen Sunrisers Hyderabad nungi asaya liasü.

Club nung pa Hemang Badani (head coach), Matthew Mott (assistant coach), Munaf Patel (bowling coach) aser Venugopal Rao (director of cricket) nunger den inyaksü.

March 22 nü tenzüksü aliba IPL season atema Capitals puri tang tashi captain shima mali. Pa mezüngbuba asaya Lucknow Super Giants den March 24 nü Vizag nung asayatsü.

UP Warriorz-i Chamari melena Georgia shimogo



Tsüklai/February 27, 2025 (Agencies): Women's Premier League (WPL) 2025 nung tanungba asayatem atema UP Warriorz (UPW)-i Chamari Athapaththu melena Georgia Voll shimogo, ta official WPL sangdong ka ajanga

metetdaksü.

Voll ya Australia team nung international asayar ka lir. La ya top-order batter ka lir aser lai career tenzüker mapang tatsüka tsüngda la dak sempet tajung aliba sayua tanabuba ODI asayaba mapang century ka yanglua liasü.

International jenjang nung lai tang tashi nung Australia tenüing nungi T20I asem ODI asem aser Test ka asayar lir.

Australia tsürla ya UPW nung sen lakh 30 yong denogo. La T20I asaya nung Australia

tenüing nungi 2025 küm January ita nungi asaya tenzüker aser tang tashi nung asaya asem asayar lir.

Lai tawa Women's Big Bash League 2024-25 season nunga kanga junga asayaogo. Iba asayamung nung la Sydney Thunder nungi asaya aser iba mapang lai run 330 yanglu, koba lar team nung run timtiba yangluba tanabuba liasü.

WPL 2025 nung UP Warriorz pur tang pezübuba nung lir. Parnoki asaya pongu nungi ana koka point pezü ngur lir.

NSF tem nem Delhi nung office agütsütsü

Tsüklai/February 27, 2025 (Agencies): Sports ministry-i züngoksema aliba National Sports Federations (NSFs) tem nem Delhi nung Centre sorkar meyong stadium tem nung office agütsütsü sentong lir.

Taa tera agir Jawahar Lal Nehru Stadium, Major Dhyan Chand National Stadium, Thyagraj Stadium, aser Talkatora Stadium nung NSF tem nem office agütsütsü, ta ministry source kati ashi.

"Linük yimtiba nung federation ajak nem office agütsütsü ministry sentong lir. Sports federations tem nem teyari agütsütsü atema sentong yangluba nung iba ya ka lir," ta sports ministry source-i Indian Express dang ashi. "NSF temi inyakyim tetsüdaksü makai benokyonga aotsü atema office maliba tebilemtsü lemsatepba den office agütsütsü onok dang mepeshia arudar, anungji onoki parnok nem teyari agütsütsü telemetba agiogo," ta source-isa shisem.

Draft sports bill atema NSF tem den ministry-i sensaksema mapang ken o ya benokogo. Taoba mapang taa kanga aika asüba ajanga stadium tem nung office mekazüker inyaksangshitsü

mekoki liasü.

National Anti-Doping Agency bo küm ishika tejakdang Jawahar Lal Nehru Stadium-i office belenerogo.

2036 Olympics atema bid asütsü linük sentong aliba temulung dang yur sports ministry-i, NSF tem nem senotsü teyari agütsütsü atema inyakyimtem lepa repringshitsü asoshi züngsem trok agi kümteba committee ka tentettsüogo.

Annual budget tesüsabuba nung ministry-i NSF tem nem sen crore 400 agütsüogo, koba taoba küm crore 340 liasü.

Iba committee ya joint secretary (sports) Kunal lenisüba nung inyaksangshitsü, kong executive director (Teams) Ritu Pathik, Target Olympic Podium Scheme (TOPS) CEO NS Johal, taoba TOPS CEO commodore (Retd) PK Garg, aser Indian Weightlifting Federation (IWF) tir Sahdev Yadav nunger densema lir.

Taoba küm November ita 2036 Olympic aser Paralympic Games ayongzüka asayatsü atema International Olympic Committee's (IOC) Future Host Commission nem 'Letter of Intent' agütsüogo.

AIFF-i Churchill Brothers merenshi



"AIFF Disciplinary Committee-i, Churchill Brothers FC Goa-i I-League 2024-25 Regulations kübok Article 6.5.6 aser 6.6.6 nung aibelen February 17 nü Aizawl FC den asayaba mapang temsü maliba asayar asayadaksüba ngutetogo."

"AIFF Disciplinary Code Article 57 aser Article 26 dak ajemdaker iba asaya ya Churchill Brothers FC Goa-i goal 0-3 agi makok akümtsü," ta

Tsüklai/February 27, 2025 (Agencies): I-League nung Aizawl FC den asayaba mapang temsüa maliba asayar asayadaksüba atema All India Football Federation's (AIFF) disciplinary committee-i Brehostibarnü Churchill Brothers FC merenshia parnok iba asaya goal 0-3 agi makok kümdaksü.

February 17 nü Rajiv Gandhi Stadium, Mizoram nung asayaba asaya ya goal 1-1 agütsür tembanga liasü.

National federation-i sangdong ka ajanga ashiba agi,

kasa sangdong ajanga metetdaksü.

Iba temerenshi agüjaka Churchill Brothers pur I-League nung tanabuba jenjang nung lir. Parnoki asaya 16 nung point 28 ngua lir, koba temaba jenjang nung aliba Inter Kashi dang nungi point asem agi tajemba lir. Inter Kashi pura asaya 16 asayar lir.

Iba hopta tetenzüklen Namdhari FC nema AIFF-i kasa temerenshi agütsüogo. January 13 nü Inter Kashi den asayaba mapang aibelenba atema parnok merenshia liasü.

BILEMDANGANG

"Alar ama mapa inyakang aser chuba ama chiyongang."